

INDUSTRIALDE ETA ENPRESAGUNEETAN HONDAKINEN BILKETA-ZERBITZUA ARAUTZEKO ORDENANTZA

I ATALA ZERBITZUAK EMATEKO BALDINTZA OROKORRAK ETA EREMUA

1. artikulua. Zerbitzuaren xedea.

1. Zarauzko udalerrian udal-eskumeneko eremuan dauden industrialde eta enpresaguneetako komertzio, enpresa eta industrietan hiri-hondakinekin asimilagarriak diren hondakinak biltzeko zerbitzua emango da. Ordenantza honen xedea Zarauzko Udalak zerbitzu hori zein baldintzatan emango duen eta erabiltzaileak nola erabiliko duen arautzea da.

2. Zerbitzuaren erabiltzaile kategoria izango dute dagokion industrialde edo enpresaguneeko komertzio-, industria- edo zerbitzu-establezimendu guztiek. Erabiltzaile hauek indarrean dauden xedapenekin eta ordenantza honekin bat etorri erabiliko dute zerbitzua.

2. artikulua. Hiri-hondakinen eta hondakin asimilagarrien definizioa.

Hiri-hondakinak edo udal-hondakinak honako hauek dira: etxebizitza partikularretan sortutako hondakinak, denda, bulego eta zerbitzuetan sortutakoak, baita arriskutsuztat sailkatu ez direnak ere, baina izaera edo konposizioa kontuan hartuta lehen aipatu ditugun lekuetan edo jardueretan sortzen diren hondakinekin asimilagarriak direnak.

3. artikulua. Salbuespenak.

Hondakinak biltzeko zerbitzuak ez ditu jasoko ondorengo ezaugarriak dituzten hondakinak:

1. Une bakoitzean indarrean dagoen ingurumen legedian "toxiko edota arriskutsu" gisa tipifikatutako hondakinak. Hala nola, pinturak, tindagaiak, erretxinak, kolak, disolbatzaileak, produktu kimikoak, pestizidak, hodi fluoreszenteak, lanparak, pilak, bateriak, erabilitako olioak, likido hidraulikoak, osasun- eta albaitaritza-zerbitzuetakoak edo ikerketako hondakinak.

2. Era berean, bilketa zerbitzuak ez ditu onartuko % 65etik gorako hezetasuna daukaten hondakinak.

3. Bere ezaugarri bereziengatik, garraiatzea, biltzea, baloratzea edo ezabatzea eragotziko duen hondakina edo bilketa zailtzen duena. Honelakoetan Udalak behartu dezake hondakinaren ekoizlea edo edukitzailea, hondakin horiek bildu aurretik ahal den neurrian ezaugarri berezi horiek kentzera edo murriztera, edo bestela hondakin horiek modu eta leku egokian uztera. Gainera, behar bezala justifikatuta, hondakinaren edukitzailea behartu dezake hondakin hori bere kontura kudeatzera.

4. artikulua. Zerbitzua derrigorrez erabili eta hartzea.

1. Hondakinak biltzeko zerbitzuak interes sanitario eta ingurumenekoak ditu, beraz, derrigorrezkoa da zerbitzu hori erabiltzea eta hartzea. Hori dela eta, industrialde edo enpresagune batean zerbitzu hau eskaintzen bada, bertan dauden establezimendu edo lokaletako titular, errentari edo jabeek derrigorrez erabili beharko dute zerbitzu hau.

2. Hiri-hondakinak edo hondakin asimilagarriak dituztenek Udalari eman behar dizkiote derrigorrez, ordenantza honek zehazten dituen baldintzetan, honek birziklatu, baloratu edo ezaba ditzan.

5. artikulua. Hondakinak bertan behera uztea.

1. Debekatuta dago hondakinak eta horien kudeaketa zailduko duen edonolako nahasketa edo diluzio bertan behera uztea edo kontrolik gabe isuri edo ezabatzea. Erabiltzaileak behartuta daude hondakin eta nahasketa horiek Zarauzko Udalak jarritako ordutegi eta baldintzen arabera uztera.

2. Arau-hausleek bertan behera utzitako hondakinak kendu eta eragindako ingurua garbitu beharko dute, kasu bakoitzean dagozkien zigorrak alde batera utzita.

6. artikulua. Hondakinak manipulatzeko.

Udal bilketa-zerbitzuak eta Zarauzko Udalak berariaz baimendutako pertsonalak bakar-bakarrik izango dute hondakinak manipulatzeko eskumena.

7. artikulua. Bilketaz arduratzen den pertsonala legitimatzea.

Hondakinak biltzen aritzen den pertsonala bakarrik arduratuko da hondakinak jaso eta eramateaz. Hondakin horiek beste edozein pertsona fisiko edo juridikori ematen baldin bazaizkio, horien ondorioz sortutako edozein kalteri biek bat eginda erantzun beharko diote, jar daitezkeen zigorrak alde batera utzita.

8. artikulua. Hondakinak biltzeko baimenak.

1. Zarauzko Udaleko zerbitzuak edo zerbitzuek bakarrik dute hiri-hondakinak edo hondakin asimilagarriak jasotzeko ahalmena. Hori dela eta, debekatuta dago beste edozein pertsona fisiko edo juridikok hondakinak biltzea, ondorengo atalean adierazten diren kasuetan izan ezik.

2. Aurrez Zarauzko Udalaren baimena jaso dutenek bakarrik izango dute hiri-hondakinak edo hondakin asimilagarriak jasotzeko aukera. Baimena jaso dutenek agiri bidezko erregistroa osatu beharko dute eta bertan honakoak jasoko dira: kudeatutako hondakinen kopurua, izaera, jatorria, helburua, bilketaren maiztasuna, garraiobidea eta baloratzeko metodoa. Agiri hauek Udalaren esku jarriko dira, honek eskatzen dituen bakoitzean. Urte natural bakoitzari dagokion informazioa hurrengo bost urtean gorde beharko da.

3. Zarauzko Udalak hiri-hondakinak kudeatzeko jarduerak zuzenean egin ahal izango ditu edo bestela toki araubideari buruzko legedian aurreikusitako beste edozein kudeaketa modu erabil dezake.

9. artikulua. Zerbitzua emateagatiko tasa.

Zarauzko Udalak urtero hondakinak biltzeko zerbitzua emateari dagokion tasa ezarriko du. Horretarako, ahal dela, proportzionaltasun printzipioa aplikatuko du sortutako hondakin kopuruaren eta ordaindu beharreko kopuruaren artean. Erabilizaileek tasa hori ordainduko dute, dagokion ordenantza fiskalak xedatutakoarekin bat etorriz.

II. ATALA HONDAKINEN BILKETA-ZERBITZUA

10. artikulua. Bilketa-zerbitzua.

Bilketa-zerbitzuak koordinatzeko ondorengo hondakinak hartuko dira kontuan:

1. Hondakin inerte arruntak: ezin daitezke berreskuratu edo baloratu, beraz, ezabatu egiten dira.
2. Hondakin organikoak: jatetxeetan, jangeletan, elikagaiak manipulatzeko dituzten enpresetan eta abarretan sortutakoak.
3. Beren konposizio edo ezaugarriengatik tratatu ondoren birziklapenaren bidez berreskuratu, berrerabili edo balioa har dezaketen hondakinak; hala nola, papera, kartoia edo egurra. Bilketa hau beste zenbait materialetara zabaldu ahal izango da teknikak horiek berreskuratzeko aukera ematen duenean. Zerbitzua beste material batzuetara zabaltzeko erabakia hartzea Zarauzko Udalarari dagokio.
4. Beren ezaugarriengatik tratamendu berezia behar duten hondakinak. Horrelakoetan Udalak bilketa bereziak sustatu eta koordinatuko ditu Eusko Jaurlaritzak baimendutako kudeatzaileen bitartez.

III. ATALA HONDAKIN INERTE ARRUNTEN BILKETA-ZERBITZUA

11. artikulua. Hondakin inerte arruntak biltzea.

Honelako hondakinak biltzeko zerbitzua ondorengo zehaztapenekin bat etorritz egingo da:

1. Beren ezaugarriengatik berreskuratu ezin daitezkeen hondakin inerteak: ezin dira berrerabili, birziklatu edo berriz baloratu.
2. Hondakinak establezimendu, komertzio, industria edo lokal bakoitzari Udalak jarritako edukiontzietan botako dira derrigorrez. Edukiontzi horiek Udalak onartutako modelo normalizatukoak izango dira. Udalak beste edukiontzi mota batzuk edo hondakinak biltzeko beste sistema batzuk erabiltzea erabakitzen badu, une horretan ordenantza honekiko arau

osagarriak emango ditu. Xedea, beti ere, bilketa-zerbitzua ahalik eta egokien ematea izango da.

3. Edukiontzi hauek bilketa-zerbitzua eragozpenik gabe egiteko tokietan jarri beharko dira; hau da, establezimendu edo lokalen ate edo inguruetan. Udal zerbitzuei dagokie toki hauek zehaztea. Dena dela, zerbitzua erabiltzen dutenek kontuan izango dute bai edukiontzia bai barruko edukia beren ardurapekoak direla. Beraz, bilketa-zerbitzua ez da arduratuko edukiontzietatik kanpo edo inguruan egon daitezkeen hondakinez. Edukiontzietan botatuko edukia hondakinak biltzeko ibilgailuan hustu ondoren, bilketa-zerbitzuak edukiontzi hori berriz ere erabiltzaileari itzuli edo hartu duen leku berean utzi beharko du.

4. Zarauzko Udalak edo bilketa-zerbitzuak zuzenean emandako edukiontziak bakarrik erabili daitezke. Ezin da bestelako edukiontzirik erabili; honela behar bezala identifikatu baitaitezke. Erabiltzaileak gutxienez edukiontzi normalizatu bat derrigorrez hartu beharko du, eta honek ordenantza honen xede diren hondakinak biltzeko zerbitzurako bakarrik erabili ahal izango du.

5. Edukiontzi horietan ezin dira gaika bilduko diren hondakinak bota (adibidez, papera, kartoia, beira, metala, egurra, etab.). Bilketa-zerbitzuak zama ez jasotzea erabaki dezake, edukia zein den ziurtatu ondoren.

6. Edukiontzian hondakin toxikoak edota arriskutsuak, edo gaika biltzekoak bota direla frogatzen bada, bilketa-zerbitzuko arduradunak hori kontuan hartu eta ez du zama onartuko. Ondoren Udaleko zerbitzu tekniko eta juridikoei jakinaraziko die, hauek dagokion zigor-espeditari hasiera eman diezaioten.

12.artikulua. Hondakin inerte arruntak biltzeko maiztasuna.

1. Hondakin inerte arruntak (hau da, edukiontzian bildutako eta ezabatzeko helburua duten hondakin guztiak) gutxienez astean behin bilduko dira. Maiztasun hau aldatu ahal izango da erabiltzaileen benetako beharren arabera, baina horretarako aurrez Zarauzko Udalaren erabakia behar da. Zerbitzuaren erabiltzaile batek, arrazoi justifikatuak direla eta, hondakinak astean bi aldiz biltzea behar badu, Udalari jakinarazi beharko dio, zerbitzua arrazionalizatzeke.

2. Hondakinak biltzeko zerbitzuaren ordutegia, ahal bada, lanorduekin bat etorriko da, honela bilketa, identifikazio eta edukiontzia itzultzeko lanak errazagoak izateko.

IV. ATALA HONDAKIN ORGANIKOEN BILKETA-ZERBITZUA

13. artikulua. Hondakin organikoen bilketa.

Honelako hondakinak ondorengo zehaztapenen arabera bilduko dira:

1. Honakoetan sortutako hondakin organikoak bilduko dira: ostalaritzako establezimenduetan, enpresetako jangeletan, elikagaiak manipulatzeko dituzten enpresetan eta, industrialde edo enpresagunean egonik, beren produkzio-prozesuetan hondakin organikoak sortzen dituzten establezimenduetan.

2. Hondakinak derrigorrez poltsa itxietan sartuko dira establezimendu edo enpresa bakoitzari Udalak jarritako edukiontzietan. Edukiontzi horiek hondakin inerte arruntak jasotzeko antzekoak izango dira baina beste kolore bat izango dute. Hauek ere Udalak onartutako modelo normalizatukoak izango dira. Udalak beste edukiontzi mota batzuk edo hondakinak biltzeko beste sistema batzuk erabiltzea erabakitzen badu, une horretan ordenantza honekiko arau osagarriak emango ditu. Xedea, beti ere, bilketa-zerbitzua ahalik eta egokien ematea izango da.

3. Edukiontzi hauek bilketa-zerbitzua eragozpenik gabe egiteko tokietan jarri beharko dira; hau da, establezimendu edo lokalen ate edo inguruetan. Udaleko zerbitzuei dagokie toki hauek zehaztea. Dena dela, zerbitzua erabiltzen dutenek kontuan izango dute bai edukiontzia bai barruko edukia beren ardurapekoak direla. Beraz, bilketa-zerbitzua ez da arduratuko edukiontzietatik kanpo edo inguruan egon daitezkeen hondakinez. Edukiontzietan botatuko edukia hondakinak biltzeko ibilgailuan hustu ondoren, bilketa-zerbitzuak edukiontzi hori berriz ere erabiltzaileari itzuli edo hartu duen leku berean utzi beharko du.

4. Zarauzko Udalak edo bilketa-zerbitzuak zuzenean emandako edukiontziak bakarrik erabili daitezke. Ezin da bestelako edukiontzirik erabili; honela behar bezala identifikatu baitaitezke. Erabiltzaileak gutxienez edukiontzi normalizatu bat derrigorrez hartu beharko du, eta honek ordenantza honen xede diren hondakinak biltzeko zerbitzurako bakarrik erabili ahal izango du.

5. Edukiontzi horietan ezin dira gaika bilduko diren hondakinak bota (adibidez, papera, kartoia edo egurra). Bilketa-zerbitzuak zama ez jasotzea erabaki dezake, edukia zein den ziurtatu ondoren. Era berean, ahalik eta hondakin gehien berreskuratzeko, establezimendu hauetan sor daitezkeen beirazko ontziak ere ez dira onartuko. Beirazko hondakin horiek botatzeko establezimendu horietatik hurbil erabilera arrunteko iglu-edukiontziak jarriko dira, hiri-bidean kokatuta dauden antzekoak. Honelako hondakinak sortzen dituztenek edukiontzi horietan sartuko dituzte, betiere edukiontzi horiek erabiltzeko aplikazio-arau orokorrak errespetatuta. Beharrezkoa izanez gero, Udalak zerbitzu honen erabiltzaileei potu bereziak emango dizkie, beirazko ontzi hauek bere establezimendutik edukiontziraino garraiatzeko.

6. Edukiontzian hondakin toxikoak edota arriskutsuak, edo gaika biltzekoak bota direla frogatzen bada, bilketa-zerbitzuko arduradunak hori kontuan hartu eta ez du zama onartuko. Ondoren Udaleko zerbitzu tekniko eta juridikoei jakinaraziko die, hauek dagokion zigor-espeditari hasiera eman diezaioten.

14. artikulua. Hondakin organikoak biltzeko maiztasuna.

1. Hondakin organikoak astean gutxienez lau aldiz bilduko dira. Maiztasun hau aldatu ahal izango da benetako beharren arabera, baina horretarako aurrez Zarauzko Udalaren erabakia behar da.

2. Hondakinak biltzeko zerbitzuaren ordutegia, ahal bada, hondakin organikoak sortzen dituzten establezimenduak irekitzeko ordutegiarekin bat etorriko da, honela bilketa, identifikazio eta edukiontziak itzultzeko lanak errazagoak izateko.

V ATALA HONDAKINEN GAIKAKO BILKETA-ZERBITZUA

15. artikulua. Hondakinak gaika biltzea.

1. Gaika bilduko diren hondakinak, adibidez kartoia eta egurra, bere birziklapena zaildu edo eragotziko duten gainerako hondakinetatik guztiz bereizita utziko dira. Horretarako erabiltzaileek hondakinak establezimendu edo lokalaren barruan gordeko dituzte, bilketa-zerbitzuak erraz iristeko toki batean eta ez da beharrezkoa izango edukiontzi batean sartuta egotea. Kartoizko hondakinak behar bezala tolestuta egongo dira. Hondakinek

material desegokiak badituzte eta, bilketa-zerbitzuaren iritziz, hondakin horiek berreskuratzeko arazoak sortzen badituzte, ez dira jasoko.

16. artikulua. Hondakinak gaika biltzeko zerbitzuaren maiztasuna.

1. Berreskuratu daitezkeen hondakinen gaikako bilketa gutxienez astean behin egingo da.
2. Hondakinak biltzeko zerbitzuaren ordutegia, ahal bada, lanorduekin bat etorriko da, honela bilketa, identifikazio eta honelako hondakinak botatzeko baldintzak betetzen diren kontrolatzeko lanak errazagoak izateko.
3. Bilketa hau beste zenbait materialetara zabaldu ahal izango da teknikak horiek berreskuratzeko aukera ematen duenean. Zerbitzua beste material batzuetara zabaltzeko erabakia hartzea Zarauzko Udalarari dagokio.

**VI. ATALA
ARAU BEREZIAK**

17. artikulua. Hondakinak biltzeko zerbitzu berezia.

Hondakin ekoizle edo edukitzaile batek, noiz edo noiz, ohikoa baino askoz hondakin kopuru handiagoa badu botatzeko, eta ondorioz bilketa-sistemari kalteak eragiten badizkio eta horrek gainerako erabiltzaileei eragingo badie, ezingo ditu hondakin horiek normalean ateratzen dituen hondakinekin batera atera. Hala ere, bilketa-zerbitzuei horiek jasotzeko eskatu ahal izango die, eta gero dagokion kontua pasako zaio.

18. artikulua. Norbere kontura egindako bilketa.

1. Erakunde eskudunek egindako txostenekin bat etorriz, Zarauzko Udalaren iritzirako hondakinek ezaugarri arriskutsuak badituzte edo beren egoera, konposizio edo kopuruagatik biltzea, garraiatzea, baloratzea edo ezabatzea zaila bada, Udalak ekoizlea behar dezake horiek bere kontura jasotzera eta horretarako legez egokitutako toki edo tokietara garraiatzera. Derrigorrezkoa izango da hondakinak leku horietan hartzea.
2. Kasu honetan, ekoizle guztiek edo bilketa bere kontura egiten dutenek beharrezko neurriak hartu beharko dituzte hondakinen bolumena ahalik eta

gehien murrizteko eta garraioa eta amaierako tratamendua ordenantza honekin eta indarrean dagoen gainerako araudiarekin bat etorritz egin direla ziurtatzeko. Horiek guztiak segurtasun eta higiene baldintzak beteta egingo dira.

3. Artikulu honetan adierazitako salbuespenaren ondorioz eragindako kalte-galeren erantzukizuna hondakinen ekoizle edo edukitzailearena bakarrik izango da. Udalak behar adina ikuskaketa egiteko eskubidea izango du eta hondakinak eramateko orduan edozein aldaketa edo erreforma egin dadin eska dezake.

VII. ATALA

BILKETA-ZERBITZUA EMATEKO ORDUTEGI BEREZIAK

19. artikulua. Bilketaren maiztasuna eta ordutegia aldatzea.

1. Zerbitzua emateko ordutegi, modu edo maiztasunean edozein aldaketa gertatzen denean, Udaleko zerbitzuek behar den aurrerapenarekin emango dute aldaketa horren berri, larrialdi egoeretan erakunde eskudunak emandako xedapenak izan ezik.

2. Udalak bilketaren maiztasuna eta ordutegiak alda ditzake, erabiltzaileen intereserako onuragarria dela uste duenean.

3. Hondakinak biltzeko eguna aste barruko jai egun batean tokatzen bada, egun horretako bilketa aurreratu edo atzeratu egingo da, udal zerbitzuen irizpidearen arabera.

4. Larrialdietan edo ezinbesteko kasuetan bilketa-zerbitzu arrunta ematea ezinezkoa bada, Zarauzko Udalak jakinarazi ondoren, erabiltzaileek ez dituzte hondakinak bide publikora aterako zerbitzua normalizatu arte edo Udalak bidezko jarraibideak eman arte. Jakinarazpena hondakinak atera ondoren egiten bada, erabiltzaile bakoitzak berriz ere hondakinak jaso eta behar bezala gorde beharko ditu, eta ez dituzte aterako zerbitzua normalizatu arte edo Udalak bidezko jarraibideak eman arte.

5. Horrek ez du inola ere tasak murrizteko eskubiderik sortuko, ezta kalterik sortzen bada hori lehengoratu beharrik ere.

VIII. ATALA HONDAKIN-EKOIZLEEN ERANTZUKIZUNA

20. artikulua. Erantzukizuna.

1. Hiri-hondakin edo hondakin asimilagarrien edukitzaileek Udalari eman behar dizkiote, ordenantza honetan zehaztutako baldintzetan, horiek birziklatu, baloratu edo ezabatzeko. Ematen diren unetik Udalak hartuko du horien jabetza eta edukitzaileek ez dute hondakin horiek sor ditzaketen kalteekiko inolako erantzukizunik izango, baldin hondakin horiek ematerakoan ordenantza hau eta gainerako arau aplikagarriak bete badira.

2. Hondakinak sortzen dituzten enpresek arduradun-solaskide bat izendatu beharko dute, hondakinen bilketarako une bakoitzean jarduketa egokienak direnak koordinatzeko.

21. artikulua. Ikuskapena eta zaintza.

1. Hondakin ekoizleek edo edukitzaileek lankidetzara osoa eskaini beharko diete Zarauzko Udaleko ikuskapen-zerbitzuei, hauek beren azterketak eta kontrolak egin ditzaten, laginak hartu eta informazioa bil dezaten eta ordenantza hau betetzeko beste edozein lan egiteko.

2. Ikuskapen lanak egiten dituzten pertsonak agintaritzaren agenteak izango dira eta hauek egiaztatutako eta aktaren bitartez formalizatutako gertakariak frogatu ondorioetarako ziurtasunezko presuntzioa izango dute.

IX. ATALA ARAU-HAUSTE ETA ZIGORRAK

22. artikulua. Arau-hausteak.

Ordenantza honetan jasotako zehaztapenak ez betetzea arau-haustetzat joko da, honakoekin bat etorriz: Euskal Herriko ingurumena babesteko 3/1998 Lege orokorraren 108 artikulua eta hurrengoetan xedatutakoa, eta Hondakinei buruzko 10/1998 Legearen 34 artikulua eta hurrengoetan xedatutakoa.

Ordenantza honetako arau-hausteak ekintza egiten denetik edo ingurumenari egindako kaltea detektatzen denetik (kaltea berehalakoa ez denean) kontatzen hasi eta urtebetera preskribatuko dira.

Beste organo eskudun batzuek ezar ditzaketen arau-hausteei kalterik egin gabe, hondakinekin lotutako jardueri buruzko arau-hausteak honela sailkatzen dira: oso larriak, larriak eta arinak.

Ondoren tipifikatu diren arau-hausteren bat egiten bada, dagozkion zigorrak jarriko dira, ordenantza honetan aurreikusitako moduan eta zenbatekoan.

1. Arau-hauste oso larriak:

- a) Ordenantza honek arautzen dituen jarduketekin lotutako baimen edo lizentziak lortzeko administrazio-espedienteari emandako datuak maltzurkeriaz aldatzea edo horietako batzuk ezkutatzea.
- b) Hondakin arriskutsuak kontrolik gabe bertan behera utzi, isuri edo ezabatzea.
- c) Bestelako edozein hondakin kontrolik gabe bertan behera utzi, isuri edo ezabatzea, baldin horren ondorioz ingurumenean kalte edo hondatze larria eragin badu, edo pertsonen osasuna arrisku larrian jarri badu.
- d) Edukiontzietan hondakin toxikoak edota arriskutsuak botatzea edo hondakin horiek beren artean edo arriskutsu edota toxiko ez direnekin nahastea, baldin horren ondorioz ingurumenean kalte edo hondatze larria eragin badu, edo pertsonen osasuna arrisku larrian jarri badu.
- e) Edukiontzietan gaikako hondakinak edota hondakin solido inerteak edota hondakin organikoak bota edo nahastea, baldin horren ondorioz ingurumenean kalte edo hondatze larria eragin badu, edo pertsonen osasuna arrisku larrian jarri badu.
- f) Hondakinak zehaztutako lekuetatik kanpo uztea, kontrolik gabeko isurketa-guneak sortuz.
- g) 3 urteren buruan 3 arau-hauste larri egin edo pilatzea.

2. Arau-hauste larriak:

- a) Arriskutsua ez den edonolako hondakina kontrolik gabe bertan behera utzi, isuri edo ezabatzea, baldin horren ondorioz ingurumenean kalte edo hondatze larririk eragin ez bada, edo pertsonen osasuna arrisku larrian jarri ez badu.

- b) Aplikagarria den araudiak edo baimenean jasotako baldintzek eskatzen duten dokumentazioa ematearen betebeharra ez betetzea edo datuak ezkutatu edo faltsutzea, eta dokumentazio hori zaindu eta gordetzeko betebeharra ez betetzea.
- c) Edukiontzietan gaikako hondakinak edota hondakin solido inerteak edota hondakin organikoak bota edo nahastea, baldin horren ondorioz ingurumenean kalte edo hondatze larririk eragin ez bada, edo pertsonen osasuna arrisku larrian jarri ez badu.
- d) Edukiontzietan hondakin toxikoak edota arriskutsuak botatzea edo hondakin horiek beren artean edo arriskutsu edota toxiko ez direnekin nahastea, baldin horren ondorioz ingurumenean kalte edo hondatze larririk eragin ez bada, edo pertsonen osasuna arrisku larrian jarri ez badu.
- e) Arriskutsuak ez diren hondakinak eskuratu, saldu edo ematea Hondakinei buruzko 10/1998 Legean adierazi gabeko pertsona fisiko edo juridikoei; baita hondakin horiek onartzea ere, baldin dagozkien baimenetan edo aipatutako Legean ezarritako arauetan adierazitako baldintzetan egiten ez bada.
- f) Bilketa-zerbitzuaren erabiltzaileak, arrazoi justifikaturik gabe, uko egitea berak sortzen dituen hondakinak Udalaren esku jartzeari.
- g) Hondakinen zamaketa-lanak eta garraioa oztopatzea.
- h) Administrazio publikoaren ikuskaketa eta kontrolak eragozteak.
- i) 3 urteren buruan 3 arau-hauste arin egin edo pilatzea.
- j) 1. puntuan adierazitako arau-hausteren bat egitea, baina duen garrantzi txikiagatik, ezin direnak oso larri moduan kalifikatu.

3. Arau-hauste arinak:

- a) Aplikagarria den araudiarekin edo baimenetan jasotako baldintzekin bat etorriz, Administrazioari eman beharreko dokumentazioa aurkezterakoan atzeratzea.

- b) 1. eta 2. puntuetan adierazitako edozein arau-hauste, baldin pertsonengan, hauen ondasunetan edo ingurumenean izan duen eragin txikiagatik, ezin bada oso larri edo larri moduan kalifikatu.
- c) Oro har, ordenantza honek ezartzen dituen betebeharrak ez betetzea eta hondakinak biltzeko zerbitzuaren funtzionamendu ona eragotziko duten gainerako egite eta ez-egite guztiak.

23. artikulua. Zigorrak.

1. Aurreko artikuluan aurreikusitako arau-haustek egiten badira, honako zigorrak ezarri ahal izango dira:

- a) Arau-hauste oso larriak:
 - Isuna: 30.000 euro eta 1.200.000 euro bitartekoa.
- b) Arau-hauste larriak:
 - Isuna: 600 euro eta 30.000 euro bitartekoa.
- c) Arau-hauste arinak:
 - Isuna: 600 euro bitartekoa, hondakin arriskutsuen kasuan izan ezik. Honelakoetan isuna 6.000 euro bitartekoa izango da.

2. Zigorrek ezartzeko kontuan izango dira erantzulearen egoera, bere errumaila, behin baino gehiagotan errepikatzea, parte-hartzea eta lortutako onura, eta ingurumenari eragindako kalte-maila edo pertsonen osasunean eragindako arrisku-maila.

3. Zigorrek jartzeak ez du alde batera uzten Administrazioak kalte-galerak jasotzeko izan dezakeen eskubidea.

24. artikulua. Arau-hauste eta zigorren preskripzioa.

Arau-hauste oso larrien ondorioz jarritako zigorrak hiru urtera preskribatuko dira; arau-hauste larrien ondorioz jarritakoak bi urtera; eta arinen ondorioz jarritakoak urtebetera. Preskripzio-epaia zigorra jartzeko ebazpen irmoa hartu eta hurrengo egunetik hasiko da kontatzen.

Zigortzeko ahalmena preskribatu eta igarotako denbora edozein izanda ere, Zarauzko Udalak erantzuleei eska diezaieke ondasunak lehengoratzeko eta berriz ere hasieran zeuden moduan uzteko.

25. artikulua. Nahitaez betearaztea. Lehengoratzeko betebeharra, hertsatzeko isunak eta subsidiarioki betearaztea.

1. Arau-hausleak behartuta daude gauzak lehengoratzeko eta berriz ere arau-haustea egin aurretik zeuden egoeran uzteko, jarri zaien zigorrari kalterik egin gabe.

2. Arau-hausleek aurreko puntuan ezarritakoarekin arabera, dagokion errekerimenduan adierazitako epeak igaro ondoren gauzak lehengoratzen edo berritzen ez badituzte, organo eskudunak hertsatzeko isunak jar ditzake 30/1992 Legearen 99 artikuluekin bat etorriz. Isun horren kopuruak ez du gaindituko egindako arau-hausteari ezarritako isunaren herena.

3. Era berean, kasu hauetan eta lehengoratzeko lanak egiten ez badira, Udalak subsidiarioki egin ahal izango ditu, arau-hauslearen kontura.

4. Zigorren, kalte-ordainen eta aldatutakoa lehengoratzeko kostu ekonomikoaren kopuruak premiamendu administratibo bidez eskatu ahal izango dira, dagozkien ebazpenek bide horretan irmotasuna hartu ondoren.

26. artikulua. Beste administrazioekiko erantzukizuna.

Arau-hausleak egindako ekintzak beste administrazio publiko baterako hutsegite administratiboak izan badaitezke, Zarauzko Udalak ahalik eta azkarren jakinaraziko dizkie.

27. artikulua. Erantzukizun penala. Agintaritza judizialaren esku-hartzea.

1. Arau-hausleak egindako ekintzak delitu edo hutsegite izan badaitezke, Zarauzko Udalak agintaritza judizialari jakinarazi beharko dizkio.

2. Ekintza horiengatik arau-haustearen espedientea irekitzen bada, jarduketak agintaritza judizialari helarazi ondoren, Udalak zigor-prozedura eten egingo du, agintaritza horrek erabaki arte. Zigor-prozedura eteteak ez dio Udalari galaraziko aldatutako egoera lehengoratzeko beharrezko neurriak hartzera.

3. Ebazpen judiziala emandakoan, hori absoluziozkoa izanda ere, Udalak zigor-espedientea izapidetzen jarrai dezake, baina Auzitegiak frogatutzat jo dituen ekintzak errespetatuko ditu. Hala ere, inolaz ere ezingo da agintaritza judizialak zigortutako arrazoiengatik administrazio-zigorrik jarri.

EGINBIDEA.- Jasoarazteko Ordenantza hau, hasierako izaeraz, 2006ko martxoaren 29an egindako osoko bilkuran onetsi zuela Udalbatzarrak.

Zarautzen, 2006ko martxoaren 30an
Idazkaria

EGINBIDEA.- Jasoarazteko Ordenantza honen testu osoa 2006ko ekainaren 2ko Gipuzkoako Aldizkari Ofizialean (104 zk.) argitaratu zela, eta 2006ko ekainaren 20ean sartu zela indarrean.

Zarautzen, 2006ko ekainaren 28an
Idazkaria